

大方廣佛華嚴經入不思議解脫境界

普賢行願品

唐 闍賓三藏般若奉詔譯

爾時普賢菩薩摩訶薩，稱歎如來勝功德已，告諸菩薩及善財言：善男子！如來功德，假使十方，一切諸佛，經不可說不可說佛刹，極微塵數劫，相續演說，不可窮盡。若欲成就此功德門，應修十種廣大行願。何等爲十？一者、禮敬諸佛，二者、稱讚如來，三者、廣修供養，四者、懺悔業障，五者、隨喜功德，六者、請轉法輪，七者、請佛住世，八者、常隨佛學，九

者、恒順衆生，十者、普皆回向。善財白言：大聖！云何禮敬，乃至迴向？普賢菩薩，告善財言：善男子！言禮敬諸佛者：所有盡法界、虛空界，十方三世，一切佛刹，極微塵數，諸佛世尊。我以普賢行願力故，深心信解，如對目前。悉以清淨身語意業，常修禮敬。一一佛所，皆現不可說不可說佛刹，極微塵數身；一一身，徧禮不可說不可說佛刹，極微塵數佛。虛空界盡，我禮乃盡；以虛空界不可盡故，我此禮敬，無有窮盡。如是乃至衆生界盡，衆生業盡，衆生煩惱

盡，我禮乃盡；而衆生界乃至煩惱無有盡故，我此禮敬，無有窮盡。念念相續，無有間斷；身語意業，無有疲厭。復次，善男子！言稱讚如來者：所有盡法界、虛空界，十方三世，一切刹土，所有極微；一一塵中，皆有一切世間極微塵數佛；一一佛所，皆有菩薩海會圍繞。我當悉以甚深勝解，現前知見。各以出過辯才天女微妙舌根，一一舌根，出無盡音聲海；一一音聲，出一切言辭海；稱揚讚歎，一切如來諸功德海。窮未來際，相續不斷；盡於法界，無不周徧。如是

虛空界盡，衆生界盡，衆生業盡，衆生煩惱盡，我讚
乃盡；而虛空界乃至煩惱無有盡故，我此讚歎，無有
窮盡。念念相續，無有間斷；身語意業，無有疲厭。
復次，善男子！言廣修供養者：所有盡法界、虛空界
，十方三世，一切佛刹，極微塵中，一一各有一切世
界極微塵數佛；一一佛所，種種菩薩海會圍繞。我以
普賢行願力故，起深信解，現前知見；悉以上妙諸供
養具，而爲供養。所謂：華雲、鬘雲、天音樂雲、天
傘蓋雲、天衣服雲，天種種香：塗香、燒香、末香。

如是等雲，一一量如須彌山王。燃種種燈：酥燈、油燈、諸香油燈。一一燈柱，如須彌山；一一燈油，如大海水。以如是等諸供養具，常爲供養。善男子！諸供養中，法供養最。所謂：如說修行供養、利益衆生供養、攝受衆生供養、代衆生苦供養、勤修善根供養、不捨菩薩業供養、不離菩提心供養。善男子！如前供養無量功德，比法供養一念功德，百分不及一，千分不及一，百千俱胝那由他分、迦羅分、算分、數分、喻分、優波尼沙陀分，亦不及一。何以故？以諸如

來尊重法故；以如說行，出生諸佛故。若諸菩薩，行法供養，則得成就供養如來。如是修行，是真供養故。此廣大最勝供養，虛空界盡，衆生界盡，衆生業盡，衆生煩惱盡，我供乃盡；而虛空界，乃至煩惱不可盡故，我此供養亦無有盡。念念相續，無有間斷；身語意業，無有疲厭。復次，善男子！言懺除業障者：菩薩自念：我於過去，無始劫中，由貪瞋癡，發身口意，作諸惡業，無量無邊。若此惡業，有體相者，盡虛空界，不能容受。我今悉以清淨三業，徧於法界，

極微塵刹，一切諸佛菩薩衆前，誠心懺悔，後不復造；恒住淨戒，一切功德。如是虛空界盡，衆生界盡，衆生業盡，衆生煩惱盡，我懺乃盡；而虛空界乃至衆生煩惱不可盡故，我此懺悔，無有窮盡。念念相續，無有間斷；身語意業，無有疲厭。復次，善男子！言隨喜功德者：所有盡法界、虛空界，十方三世，一切佛刹，極微塵數，諸佛如來，從初發心，爲一切智，勤修福聚，不惜身命，經不可說不可說佛刹，極微塵數劫；一一劫中，捨不可說不可說佛刹，極微塵數，

頭目手足。如是一切，難行苦行，圓滿種種波羅密門，證入種種菩薩智地，成就諸佛無上菩提；及般涅槃，分布舍利。所有善根，我皆隨喜。及彼十方一切世界，六趣四生，一切種類；所有功德，乃至一塵，我皆隨喜。十方三世，一切聲聞，及辟支佛，有學、無學；所有功德，我皆隨喜。一切菩薩，所修無量難行苦行，志求無上正等菩提，廣大功德，我皆隨喜。如是虛空界盡，衆生界盡，衆生業盡，衆生煩惱盡；我此隨喜，無有窮盡。念念相續，無有間斷；身語意業

，無有疲厭。復次，善男子！言請轉法輪者：所有盡法界、虛空界，十方三世，一切佛刹，極微塵中，一一各有不可說不可說佛刹，極微塵數廣大佛刹；一一刹中，念念有不可說不可說佛刹，極微塵數，一切諸佛，成等正覺。一切菩薩，海會圍繞。而我悉以身口意業，種種方便，殷勤勸請，轉妙法輪。如是虛空界盡，衆生界盡，衆生業盡，衆生煩惱盡；我常勸請一切諸佛，轉正法輪，無有窮盡。念念相續，無有間斷；身語意業，無有疲厭。復次，善男子！言請佛住世

者：所有盡法界、虛空界，十方三世，一切佛刹，極微塵數，諸佛如來，將欲示現般涅槃者；及諸菩薩、聲聞、緣覺，有學、無學，乃至一切諸善知識，我悉勸請，莫入涅槃；經於一切佛刹極微塵數劫，爲欲利樂一切衆生。如是虛空界盡，衆生界盡，衆生業盡，衆生煩惱盡；我此勸請，無有窮盡。念念相續，無有間斷；身語意業，無有疲厭。復次，善男子！言常隨佛學者：如此娑婆世界，毗盧遮那如來，從初發心，精進不退，以不可說不可說身命，而爲布施；剝皮爲

紙，析骨爲筆，刺血爲墨，書寫經典，積如須彌。爲重法故，不惜身命；何況王位、城邑聚落、宮殿園林，一切所有，及餘種種，難行苦行。乃至樹下，成大菩提，示種種神通，起種種變化，現種種佛身，處種種衆會。或處一切諸大菩薩，衆會道場；或處聲聞，及辟支佛，衆會道場；或處轉輪聖王，小王眷屬，衆會道場；或處刹利，及婆羅門，長者居士，衆會道場；乃至或處天龍八部，人非人等，衆會道場。處於如是種種衆會，以圓滿音，如大雷震，隨其樂欲，成熟

衆生；乃至示現，入於涅槃。如是一切，我皆隨學。如今世尊，毗盧遮那。如是盡法界、虛空界，十方三世，一切佛刹，所有塵中，一切如來，皆亦如是；於念念中，我皆隨學。如是虛空界盡，衆生界盡，衆生業盡，衆生煩惱盡；我此隨學，無有窮盡。念念相續，無有間斷；身語意業，無有疲厭。復次，善男子！言恆順衆生者：謂盡法界、虛空界，十方刹海，所有衆生，種種差別，所謂：卵生、胎生、濕生、化生，或有依於地水火風而生住者；或有依空，及諸卉木而

生住者；種種生類、種種色身、種種形狀、種種相貌、種種壽量、種種族類、種種名號、種種心性、種種知見、種種欲樂、種種意行、種種威儀、種種衣服、種種飲食，處於種種村營聚落、城邑宮殿；乃至一切天龍八部，人非人等，無足二足，四足多足，有色無色，有想無想，非有想非無想。如是等類，我皆於彼，隨順而轉；種種承事，種種供養；如敬父母，如奉師長，及阿羅漢；乃至如來，等無有異。於諸病苦，爲作良醫；於失道者，示其正路；於闇夜中，爲作光

明；於貧窮者，令得伏藏。菩薩如是平等，饒益一切衆生。何以故？菩薩若能隨順衆生，則爲隨順供養諸佛；若於衆生尊重承事，則爲尊重承事如來；若令衆生生歡喜者，則令一切如來歡喜。何以故？諸佛如來，以大悲心，而爲體故。因於衆生，而起大悲；因於大悲，生菩提心；因菩提心，成等正覺。譬如曠野，沙磧之中，有大樹王；若根得水，枝葉華果，悉皆繁茂。生死曠野，菩提樹王，亦復如是。一切衆生，而爲樹根；諸佛菩薩，而爲華果。以大悲水，饒益衆生

，則能成就諸佛菩薩智慧華果。何以故？若諸菩薩，以大悲水，饒益衆生，則能成就阿耨多羅三藐三菩提故。是故菩提，屬於衆生；若無衆生，一切菩薩，終不能成無上正覺。善男子！汝於此義，應如是解。以於衆生心平等故，則能成就圓滿大悲；以大悲心隨衆生故，則能成就供養如來。菩薩如是隨順衆生。虛空界盡，衆生界盡，衆生業盡，衆生煩惱盡；我此隨順，無有窮盡。念念相續，無有間斷；身語意業，無有疲厭。復次，善男子！言普皆回向者：從初禮拜，乃

至隨順，所有功德，皆悉迴向，盡法界、虛空界，一切衆生。願令衆生：常得安樂，無諸病苦。欲行惡法，皆悉不成；所修善業，皆速成就。關閉一切諸惡趣門，開示人天涅槃正路。若諸衆生，因其積集諸惡業故，所感一切極重苦果，我皆代受。令彼衆生，悉皆解脫；究竟成就，無上菩提。菩薩如是所修回向，虛空界盡，衆生界盡，衆生業盡，衆生煩惱盡；我此回向，無有窮盡。念念相續，無有間斷；身語意業，無有疲厭。善男子！是爲菩薩摩訶薩十種大願，具足圓

滿。若諸菩薩，於此大願，隨順趣入；則能成熟一切衆生，則能隨順阿耨多羅三藐三菩提，則能成滿普賢菩薩諸行願海。是故善男子，汝於此義，應如是知。若有善男子、善女人，以滿十方無量無邊，不可說不可說佛刹，極微塵數一切世界，上妙七寶，及諸人天最勝安樂，布施爾所一切世界所有衆生，供養爾所一切世界諸佛菩薩，經爾所佛刹極微塵數劫，相續不斷，所得功德；若復有人，聞此願王，一經於耳，所有功德，比前功德，百分不及一，千分不及一，乃至優

波尼沙陀分，亦不及一。或復有人，以深信心，於此大願，受持讀誦，乃至書寫一四句偈，速能除滅，五無間業；所有世間身心等病，種種苦惱，乃至佛刹極微塵數一切惡業，皆得消除。一切魔軍、夜叉、羅刹，若鳩槃荼，若毗舍闍，若部多等，飲血啗肉，諸惡鬼神，皆悉遠離；或時發心，親近守護。是故若人，誦此願者，行於世間，無有障礙；如空中月，出於雲翳。諸佛菩薩，之所稱讚；一切人天，皆應禮敬；一切衆生，悉應供養。此善男子，善得人身，圓滿普賢

所有功德，不久當如普賢菩薩，速得成就微妙色身，具三十二大丈夫相。若生人天，所在之處，常居勝族。悉能破壞一切惡趣，悉能遠離一切惡友，悉能制伏一切外道。悉能解脫一切煩惱；如師子王，摧伏羣獸；堪受一切衆生供養。又復是人，臨命終時，最後剎那，一切諸根，悉皆散壞；一切親屬，悉皆捨離；一切威勢，悉皆退失；輔相大臣，宮城內外，象馬車乘，珍寶伏藏，如是一切，無復相隨。唯此願王，不相捨離；於一切時，引導其前；一剎那中，卽得往生，

極樂世界。到已，卽見阿彌陀佛。文殊師利菩薩、普賢菩薩、觀自在菩薩、彌勒菩薩等，此諸菩薩，色相端嚴，功德具足，所共圍繞。其人自見，生蓮華中，蒙佛授記。得授記已，經於無數百千萬億那由他劫，普於十方不可說不可說世界，以智慧力，隨衆生心，而爲利益。不久當坐菩提道場，降伏魔軍，成等正覺，轉妙法輪；能令佛刹極微塵數世界衆生，發菩提心，隨其根性，教化成熟；乃至盡於未來劫海，廣能利益一切衆生。善男子！彼諸衆生，若聞若信此大願王

，受持讀誦，廣爲人說；所有功德，除佛世尊，餘無知者。是故汝等，聞此願王，莫生疑念；應當諦受，受已能讀，讀已能誦，誦已能持；乃至書寫，廣爲人說。是諸人等，於一念中，所有行願，皆得成就；所獲福聚，無量無邊；能於煩惱大苦海中，拔濟衆生，令其出離，皆得往生阿彌陀佛極樂世界。爾時，普賢菩薩摩訶薩，欲重宣此義，普觀十方，而說偈言：所有十方世界中，三世一切人師子！我以清淨身語意，一切徧禮盡無餘。普賢行願威神力，普現一切如來前

；一身復現刹塵身，一一徧禮刹塵佛。於一塵中塵數佛，各處菩薩衆會中；無盡法界塵亦然，深信諸佛皆充滿。各以一切音聲海，普出無盡妙言辭；盡於未來一切劫，讚佛甚深功德海。以諸最勝妙華鬘，伎樂塗香及傘蓋；如是最勝莊嚴具，我以供養諸如來。最勝衣服最勝香，末香燒香與燈燭；一一皆如妙高聚，我悉供養諸如來。我以廣大勝解心，深信一切三世佛；悉以普賢行願力，普徧供養諸如來。我昔所造諸惡業，皆由無始貪瞋癡，從身語意之所生，一切我今皆懺

悔。十方一切諸衆生，二乘有學及無學，一切如來與菩薩，所有功德皆隨喜。十方所有世間燈，最初成就菩提者，我今一切皆勸請，轉於無上妙法輪。諸佛若欲示涅槃，我悉至誠而勸請，唯願久住刹塵劫，利樂一切諸衆生。所有禮讚供養福，請佛住世轉法輪；隨喜懺悔諸善根，回向衆生及佛道。我隨一切如來學，修習普賢圓滿行；供養過去諸如來，及與現在十方佛。未來一切天人師，一切意樂皆圓滿；我願普隨三世學，速得成就大菩提。所有十方一切刹，廣大清淨妙

莊嚴；衆會圍繞諸如來，悉在菩提樹王下。十方所有諸衆生，願離憂患常安樂；獲得甚深正法利，滅除煩惱盡無餘。我爲菩提修行時，一切趣中成宿命；常得出家修淨戒，無垢無破無穿漏。天龍夜叉鳩槃荼，乃至人與非人等，所有一切衆生語，悉以諸音而說法。勤修清淨波羅密，恒不忘失菩提心；滅除障垢無有餘，一切妙行皆成就。於諸惑業及魔境，世間道中得解脫；猶如蓮華不著水，亦如日月不住空。悉除一切惡道苦，等與一切群生樂；如是經於剎塵劫，十方利益

恒無盡。我常隨順諸衆生，盡於未來一切劫；恒修普賢廣大行，圓滿無上大菩提。所有與我同行者，於一切處同集會；身口意業皆同等，一切行願同修學。所
有益我善知識，爲我顯示普賢行；常願與我同集會，
於我常生歡喜心。願常面見諸如來，及諸佛子衆圍繞
；於彼皆興廣大供，盡未來劫無疲厭。願持諸佛微妙
法，光顯一切菩提行；究竟清淨普賢道，盡未來劫常
修習。我於一切諸有中，所修福智恒無盡；定慧方便
及解脫，獲諸無盡功德藏。一塵中有塵數刹，一一刹

有難思佛；一一佛處衆會中，我見恒演菩提行。普盡十方諸刹海，一一毛端三世海，佛海及與國土海，我徧修行經劫海。一切如來語清淨，一言具衆音聲海；隨諸衆生意樂音，一流佛辯才海。三世一切諸如來，於彼無盡語言海，恒轉理趣妙法輪，我深智力普能入。我能深入於未來，盡一切劫爲一念；三世所有一切劫，爲一念際我皆入。我於一念見三世，所有一切人師子；亦常入佛境界中，如幻解脫及威力。於一毛端極微中，出現三世莊嚴刹；十方塵刹諸毛端，我皆

深入而嚴淨。所有未來照世燈，成道轉法悟群有；究竟佛事示涅槃，我皆往詣而親近。速疾周徧神通力，普門徧入大乘力，智行普修功德力，威神普覆大慈力，徧淨莊嚴勝福力，無著無依智慧力，定慧方便威神力，普能積集菩提力，清淨一切善業力，摧滅一切煩惱力，降伏一切諸魔力，圓滿普賢諸行力。普能嚴淨諸刹海，解脫一切衆生海，善能分別諸法海，能甚深入智慧海。普能清淨諸行海，圓滿一切諸願海，親近供養諸佛海，修行無倦經劫海。三世一切諸如來，最

勝菩提諸行願，我皆供養圓滿修，以普賢行悟菩提。
一切如來有長子，彼名號曰普賢尊；我今回向諸善根
，願諸智行悉同彼。願身口意恒清淨，諸行刹土亦復
然；如是智慧號普賢，願我與彼皆同等。我爲徧淨普
賢行，文殊師利諸大願；滿彼事業盡無餘，未來際劫
恒無倦。我所修行無有量，獲得無量諸功德；安住無
量諸行中，了達一切神通力。文殊師利勇猛智，普賢
慧行亦復然；我今回向諸善根，隨彼一切常修學。三
世諸佛所稱讚，如是最勝諸大願；我今回向諸善根，

爲得普賢殊勝行。願我臨欲命終時，盡除一切諸障礙；面見彼佛阿彌陀，卽得往生安樂刹。我既往生彼國已，現前成就此大願；一切圓滿盡無餘，利樂一切衆生界。彼佛衆會咸清淨，我時於勝蓮華生；親覩如來無量光，現前授我菩提記。蒙彼如來授記已，化身無數百俱胝；智力廣大徧十方，普利一切衆生界。乃至虛空世間盡，衆生及業煩惱盡；如是一切無盡時，我願究竟恒無盡。十方所有無邊刹，莊嚴衆寶供如來；最勝安樂施天人，經一切刹微塵劫。若人於此勝願王

，一經於耳能生信；求勝菩提心渴仰，獲勝功德過於彼。卽常遠離惡知識，永離一切諸惡道；速見如來無量光，具此普賢最勝願。此人善得勝壽命，此人善來人中生；此人不久當成就，如彼普賢菩薩行。往昔由無智慧力，所造極惡五無間；誦此普賢大願王，一念速疾皆消滅。族姓種類及容色，相好智慧咸圓滿；諸魔外道不能摧，堪爲三界所應供。速詣菩提大樹王，坐已降伏諸魔衆；成等正覺轉法輪，普利一切諸含識。若人於此普賢願，讀誦受持及演說；果報唯佛能證

知，決定獲勝菩提道。若人誦此普賢願，我說少分之善根，一念一切悉皆圓，成就衆生清淨願。我此普賢殊勝行，無邊勝福皆回向；普願沈溺諸衆生，速往無量光佛刹。爾時，普賢菩薩摩訶薩，於如來前，說此普賢廣大願王清淨偈已。善財童子，踴躍無量；一切菩薩，皆大歡喜！如來讚言：善哉善哉！爾時世尊，與諸聖者菩薩摩訶薩，演說如是不可思議解脫境界勝法門時。文殊師利菩薩，而爲上首；諸大菩薩，及所成熟六千比丘。彌勒菩薩，而爲上首；賢劫一切諸大

菩薩。無垢普賢菩薩，而爲上首；一生補處，住灌頂位諸大菩薩，及餘十方種種世界普來集會，一切刹海極微塵數諸菩薩摩訶薩衆。大智舍利弗，摩訶目犍連等，而爲上首；諸大聲聞，并諸人天，一切世主：天、龍、夜叉、乾闥婆、阿修羅、迦樓羅、緊那羅、摩睺羅伽，人非人等，一切大衆。聞佛所說，皆大歡喜，信受奉行。

雪廬老人書勉第四期大專明倫講座同學

敬明五倫須備十
義此世法也備乎
六度行乎四攝是
覺世法也

李炳南敬題



雪廬老人書勉第七期大專明倫講座同學

求學須到根柢
先修明性德
以真才能
負獻社會
學佛要先無我
發願利眾
直心道場
不可浮誇
作尋善事
應知專為救世
萬勿假公濟私
沽名釣譽
如斯則不失為君子

李炳南敬題

